

**Qinersisartut Inatsisartunut kommunalbestyrelsinullu qinersinermi qinersivimmi
sumiiffimmi sumiikkaluartumiluunniit qinersisinnaangornissaat anguniarlugu
suliaqaqqullugit Naalakkersuisut peqquneqarnissaannik Inatsisartut
aalajangiiffigissaattut siunnersuut.**
(Siumut)

Akissuteqaat

(Isumaginninnermut, Suliffeqarnermut, Nunamut Namminermut Avatangiisinullu Naalakkersuisoq)

Siullermeerneqarnera

Aallaqqaammut Siumut-gruppi aalajangiiffigisassatut siunnersuummut qujaffiginiarpara. Naalakkersuisut soqutiginnillutik siunnersuut misissorpaat aamma innuttaasut oqinnerusumik eqaannerusumillu qinersisinnaalersinnerisigut inuit tamat oqartussaaqataanerat nukittorsarneqarnissaanut siunertaq Naalakkersuisut taperserpaat.

Naalakkersuisut suliniutit innuttaasut tamat oqartussaaqataanerannik peqataanissamut siuarsaanissamik siunertaqartut tamaasa tikilluaqquvaat. Pingaaruteqarpoq qinersinerni sapinngisamik amerlanerpaat peqataanissaat, taamaalillutik aalajangiinerit innuttaasunit siammasissumik tapersersorneqarlutik.

Taamaattumik Naalakkersuisut siunnersuut soqutiginnillutik isiginiarpaat, innuttaasut qinersinissaannut ajornannginnerulersitsisussa – aamma namminneq najugaqarfimmi avataanniippata. Taamaattoq qinersinermi allannguinerit suleriaatsinut sinaakkutinullu atuuttunut mianerinninnissaat pingaaruteqarpoq, pingaartumik kommuninut qinersinermi, nunap immikkoortuini qinigassanngortittut qitiusumik inissisimammata. Matumani taasinerit qinersivimmut qinersisartup attuumassuteqarfigisaanut ataqatigiissinnissaat pisariaqarpoq eqqortumik naatsorsuinissaq qulakkeerniarlugu.

Taamaattumik pingaaruteqarpoq, taasineri periaatsinik allannguisoqassappat teknikkimut tunngasut aamma qinigassanngortittunut malittarisassat immikkut ittut, nunap immikkoortuinik agguataarneqarnerup kingunerisaatut ittut, sillimaffigisariaqarput.

Inatsisartunut qinersinermut atatillugu qinersisartut qinersisinnaatitaasut najugaqarfimmini qinersisinnaatitaasut allattorsimaffianni ilaatinneqarnersut qulakkeerneqarnissaat pillugu ingerlanneqarnerani unammilligassaasinnaavoq. Tamanna qinersisinnaatitaasut allattorsiffiannik qarasaasiakkut atuutitsilernikkut imaluunniit suleriaaseq alla atorneratigut, naalakkersuisoqarfiup erseqqinnerusumik misissorsinnaatigut, aaqqiivigineqarsinnaavoq. Teknikkimut tunngatillugu ajornartorsiut alla tassaavoq, taasinerit najugaqarfigisap avataani ingerlanneqartut qinersiffimmi tassani naatsorsorneqartarnerat, qinersisartup qinersivimmut attuumassuteqarfigisaaniunngitsoq. Taassuma nunap immikkoortuani naatsorsuineq sunnersinnaavaa, kisianni qinigassanngortittut nunap immikkoortuinut agguataarneqarneq ajorput, taamaattumillu kommunini qinersinertut annertoqataanik ajornartorsiutaanani.

Naalakkersuisut taasineri eqaannerusumik aaqqiissuteqarnissaq pillugu kissaammut peqataaniarlutik piareersimapput, peqatigalugu tamat oqartussaaqataanerannut tunngaviit teknikkikkullu mianerisassat ataqqillugit. Qarasaasiakkut ingerlanneqartarneranik ilusiliineq nangillugu suliarineqassappat, eqqumaffigineqassaaq, taamatut aaqqiissut annertuumik

aningaasartuuteqarfiusussaammat,
isumannaatsuunissaanullu atatillugu.

ineriartortitsinermut,

ingerlatsinermut

Tamanna tunngavigalugu Naalakkersuisut siunnersuut akuersissutigineqassasoq
inassuteqaatigaat.